

REGLUGERÐ

um úthlutun veiðiheimilda í úthafskarfa á Reykjaneshrygg.

1. gr.

Ákvæði þessarar reglugerðar taka til flotvörpuveiða á úthafskarfa utan fiskveiðilandhelgi Íslands. Ennfremur til úthafskarfaveiða fiskiskipa, sem leyfi hafa til veiða í fiskveiðilandhelgi Íslands, er þau stunda veiðar á úthafskarfa þar með flotvörpu utan línu, sem dregin er milli eftirgreindra punkta:

1. 65°20'N - 29°45'V (við miðlínu milli Íslands og Grænlands).
2. 63°00'N - 26°00'V
3. 62°00'N - 27°00'V

og vestan línu, sem dregin er 180° réttvísandi úr punkti 3 að mörkum fiskveiðilandhelgi Íslands.

2. gr.

Frá útgáfu reglugerðar þessarar er íslenskum fiskiskipum óheimilt að stunda flotvörpuveiðar á úthafskarfa án sérstaks leyfis Fiskistofu.

Aðeins er Fiskistofu heimilt að veita þeim íslenskum fiskiskipum leyfi til veiða á úthafskarfa í flotvörpu, sem aflahlutdeild hljóta í úthafskarfa samkvæmt ákvæðum 3. gr. eða hafa fengið framselt aflamark eða aflahlutdeild í úthafskarfa til sín.

3. gr.

Hverju íslensku fiskiskipi skal reiknuð aflahlutdeild í úthafskarfa, sem úthlutað er samkvæmt reglugerð þessari, og skal aflahlutdeild hvers skips reiknuð í hlutfalli við afla skips, miðað við þrjú bestu veiðiár þess almanaksárin 1991-1996. Þó skal 5% heildarkvótans úthlutað til þeirra skipa einna, sem úthafskarfaveiðar stunduðu á árunum 1989, 1990 og 1991 og skal miðað við afla allra árana.

Hafi skip, sem reglulega hefur stundað veiðar á úthafskarfa, tafist frá veiðum í a.m.k. sex mánuði samfelt vegna meiri háttar tjóns eða bilana, skal við ákvörðun aflahlutdeildar á grundvelli þessarar greinar reikna skipinu afla á því ári, sem frátafarnar verða. Skal aflinn fyrir hvert heilt ár talinn nema sama hlutfalli af heildarafla og nam meðaltalshlutfalli skipsins í úthafskarfa á þeim tveimur árum, sem liggja næst því ári eða árum, sem frátafarnar verða. Verði frátafarnar aðeins á hluta árs skal reikna aflareynsluna hlutfallslega að teknu tilliti til almennra aflabragða þann hluta árs, sem frátafarnar verða.

Úthlutun aflahlutdeildar er bundin því skilyrði, að skip sé skráð íslenskt og skal við útreikning aflahlutdeildar aðeins taka mið af afla skips þann tíma, sem það er skráð íslenskt og eigendur þess og útgerð hafa fullnægt þeim skilyrðum um eignarhald, sem sett eru fyrir veitingu veiðileyfis í fiskveiðilögsögu Íslands. Ekki skal taka tillit til afla, sem fenginn er í andstöðu við ákvæði laga nr. 80/1938, um stéttarfélög og vinnudeilur og laga nr. 20/1987, um sjómannadag. Vegna ársins 1996 skal aðeins miðað við þann afla íslenskra skipa, sem tekinn er af aflaheimildum Íslands. Hafi skip misst rétt til aflahlutdeildar samkvæmt þessari grein, þar sem það fullnægir ekki lengur skilyrðum 1. málslíðar þessarar málsgreinar, er heimilt að úthluta nýju íslensku skipi í eigu sama aðila þeirri aflahlutdeild, enda komi hið nýja skip í stað eldra skips og eigi rétt til aflahlutdeildar samkvæmt þessari grein.

Við útreikning afla samkvæmt þessari grein skal miða við 55% nýtingu, hafi úthafskarfanum verið landað hausskornum, en 30% hafi honum verið landað flökuðum með roði og beinum.

4. gr.

Á árinu 1997 er þeim íslensku skipum, sem leyfi fá til veiða á úthafskarfa með flotvörpu, sbr. 2. gr. heimilt að veiða samtals 45.000 lestir af úthafskarfa á svæði því sem skilgreint er í 1. gr. og skal Fiskistofa skipta því heildarmagni milli einstakra fiskiskipa á grundvelli aflahlutdeildar hvers skips, sbr. 3. gr.

Við útreikning aflamarks skal miðað við 55% nýtingu, sé úthafskarfa landað hausskornum en 30% nýtingu sé honum landað flökuðum með roði og beinum.

5. gr.

Úthlutun aflahlutdeildar, samkvæmt reglugerð þessari, er bundin því skilyrði, að útgerð skips afsali sér aflahlutdeild, sem úthlutað er á grundvelli laga nr. 38/1990, um stjórn fiskveiða, sem nemi 8% af þeirri úthafskarfhlutdeild, sem þeim er úthlutað á árinu 1997 samkvæmt reglugerð þessari. Frádráttur aflahlutdeildar reiknast á grundvelli verðmætastuðuls, sbr. 10. gr. reglugerðar nr. 362/1996, um veiðar í atvinnuskyni fiskveiðiárið 1996/1997, miðað við leyfilegan heildarafla yfirstandandi árs, en hefur ekki áhrif á úthlutað aflamark fiskveiðiársins 1996/1997. Verðmætastuðull fyrir úthafskarfa er hinn sami og fyrir karfa, sem veiddur er innan lögsögunnar. Þau skip, sem ekki hafa veiðiheimildir innan lögsögunnar, skulu sæta 8% skerðingu í úthlutun aflahlutdeildar í úthafskarfa.

6. gr.

Fiskistofa skal fyrir 8. febrúar 1997 senda útgerðum þeirra skipa, sem veiðireynslu hafa á ofangreindu viðmiðunartímabili, tilkynningu um bráðbirgðauthlutun samkvæmt ofangreindum reglum og forsendur hennar. Útgerðir skulu fyrir 18. febrúar 1997 tilkynna til Fiskistofu, hvort þær vilji nýta sér rétt til úthlutunar samkvæmt ofangreindum reglum og í hvaða tegundum aflahlutdeild verði skilað, sbr. 4. gr. Fyrir sömu tímamörk gefst þeim kostur á að koma athugasemdum á framfæri um bráðabirgðauthlutunina.

Fyrir 10. mars 1997 skal Fiskistofa úthluta aflahlutdeild, aflamarki fyrir 1997 og veiðileyfum.

Heimilt er að framselja aflahlutdeild og aflamark milli íslenskra fiskiskipa, samkvæmt þeim reglum, sem almennt gilda um framsal aflahlutdeildar og aflamarks samkvæmt lögum nr. 38/1990, um stjórn fiskveiða með síðari breytingum. Reglur laga nr. 38/1990 um flutning aflamarks milli ára og heimildir til breytinga milli tegunda gilda ekki um aflamark, sem úthlutað er í úthafskarfa samkvæmt þessari reglugerð.

Allur úthafskarfaafli, sem fæst á árinu 1997 í flotvörpu, skal reiknast til aflamarks viðkomandi skips á því ári.

7. gr.

Í upphafi hverrar veiðiferðar skulu skipstjórar með skeyti (faxi) tilkynna til Fiskistofu, hvenær veiðar hefjast á úthafskarfa. Þá skulu þeir einnig tilkynna til Fiskistofu hvenær veiðum á úthafskarfa lýkur hverju sinni. Í þessum tilkynningum til Fiskistofu skal áætla magn og samsetningu afla um borð. Ennfremur skal tilkynna fyrirhugaðan löndunartíma og löndunarstað.

Skýlt er að halda úthafskarfa aðgreindum frá öðrum karfa um borð í veiðiskipi og skal hann veginn sérstaklega við löndun.

Skipstjórar skulu skrá í afladagbækur nákvæmar skýrslur um veiðarnar. Í afladagbókum skal greinilega koma fram, hvort aflinn eða hve mikill hluti hans er fenginn innan landhelgi Íslands.

8. gr.

Brot á reglugerð þessari og ákvæðum leyfisbréfa gefnum út á grundvelli hennar, skulu varða viðurlögum samkvæmt III. kafla laga frá 17. desember 1996, um fiskveiðar utan lögsögu Íslands.

9. gr.

Reglugerð þessi er sett samkvæmt lögum frá 17. desember 1996, um fiskveiðar utan lögsögu Íslands til þess að öðlast þegar gildi og birtist til eftirbreytni öllum þeim, sem hlut eiga að máli. Jafnframt er felld úr gildi reglugerð nr. 189, 1. apríl 1996, um veiðar á úthafskarfa 1996.

Sjávarútvegsráðuneytinu, 27. janúar 1997.

Þorsteinn Pálsson.

Árni Kolbeinsson.

REGLUGERÐ

**um breytingu á reglugerð nr. 685, 28. desember 1996,
um úthlutun veiðiheimilda á Flæmingjagrunni.**

1. gr.

Aftan við 1. mgr. 3. gr. komi tvær nýjar málsgreinar sem orðist svo:

Úthlutun aflahlutdeildar samkvæmt 1. mgr. er bundin því skilyrði, að skip sé skráð íslenskt og skal við útreikning aflahlutdeildar aðeins taka mið af afla skips þann tíma, sem það er skráð íslenskt og eigendur þess og útgerð hafa fullnægt þeim skilyrðum um eignarhald, sem sett eru fyrir veitingu veiðileyfis í fiskveiðilögsögu Íslands. Ekki skal taka tillit til afla, sem fenginn er í andstöðu við ákvæði laga nr. 80/1938, um stéttarfélög og vinnudeilur og laga nr. 20/1987, um sjómannadag. Hafi skip misst rétt til aflahlutdeildar samkvæmt þessari grein, þar sem það fullnægir ekki lengur skilyrðum 1. málslíðar þessarar málsgreinar, er heimilt að úthluta nýju íslensku skipi í eigu sama aðila þeirri aflahlutdeild, enda komi hið nýja skip í stað eldra skips og eigi rétt til aflahlutdeildar samkvæmt þessari grein.

Telji Fiskistofa ástæðu til að ætla að veiðar tiltekins skips hafi verið stundaðar með þeim hætti að afli þess tiltekið tímabil skuli ekki reiknast til viðmiðunarafla þess, sbr. 2. mgr., þá skal Fiskistofa gefa útgerð hlutaðeigandi skips kost á að koma athugasemdum sínum á framfæri við Fiskistofu áður en til endanlegrar úthlutunar aflahlutdeildar kemur.

2. gr.

Í stað: „en frádráttur kemur til framkvæmda 1. september 1997“ í 2. málslíð 4. gr. komi: en hefur ekki áhrif á úthlutað aflamark fiskveiðiársins 1996/1997.